

淨土十疑論

隋天台智者大師說



南無本師釋迦牟尼佛

說明

根據《乾隆大藏經》此土著述第 1480 部，隋天臺智者大師說《淨土十疑論》影印本校對，並對校於弘化社民國版《淨土十要》。標點符號僅供參考。

本电子书是免费结缘品。特此说明。

仁慧草堂

二〇二〇年十二月



扫码关注仁慧草堂微信公众号

目 录

淨土十疑論序	- 1 -
淨土十疑論	- 4 -
第一疑	- 4 -
第二疑	- 6 -
第三疑	- 7 -
第四疑	- 8 -
第五疑	- 9 -
第六疑	- 11 -
第七疑	- 12 -
第八疑	- 14 -
第九疑	- 16 -
第十疑	- 17 -
淨土十疑論後序	- 21 -

淨土十疑論序

宋無為子楊傑述

愛不重不生娑婆，念不一不生極樂。娑婆，穢土也；極樂，淨土也。娑婆之壽有量，彼土之壽則無量矣。娑婆備諸苦，彼土則安養無苦矣。娑婆隨業轉輪¹生死，彼土一往則永證無生法忍，若願度生，則任意自在，不為諸業轉²矣。其淨穢、壽量、苦樂、生死如是差別，而眾生冥然不知，可不哀哉？

阿彌陀佛，淨土攝受之主也；釋迦如來，指導淨土之師也。觀音、勢至，助佛揚化者也。是以如來一代教典，處處叮嚀，勸往生也。

阿彌陀佛與觀音、勢至，乘大願船，泛生死海，不著此岸、不留彼岸、不止中流，唯以濟度為佛事。是故《阿彌陀經》云：「若有善男子、善女人，聞說阿彌陀佛，執持名號，若一日乃至七³日，一心不亂。其人臨命終時，阿彌陀佛與諸聖眾現在其前，是人終時，心不顛倒，即得往

¹ 永樂北藏本及龍藏本：轉輪；淨土十要（民國版）：輪轉

² 永樂北藏本及龍藏本：轉；淨土十要（民國版）：縛

³ 永樂北藏本及龍藏本：七；淨土十要（民國版）：若七

生極樂國土。」又經云：「十方眾生，聞我名號，憶念我國，植諸德本，至心迴向，欲生我國，不果遂者，不取正覺。」所以祇洹精舍無常院，令病者面西，作往生淨土想。蓋彌陀光明遍照法界念佛眾生，攝取⁴不捨。聖凡一體，機感相應。諸佛心內眾生，塵塵極樂；眾生心中淨土，念念彌陀。

吾以是觀之，智慧者易生，能斷疑故；禪定者易生，不散亂故；持戒者易生，遠諸染故；布施者易生，不我有故；忍辱者易生，不瞋恚故；精進者易生，不退轉故；不造善、不作惡者易生，念能一故；諸惡已作、業報已現者易生，實慚懼故。雖有眾善，若無誠信心、無深心、無迴向發願心者，則不得上上品生矣。

噫！彌陀甚易持，淨土甚易往，眾生不能持，不能往，佛如眾生何？夫造惡業入苦趣，念彌陀生極樂，二者皆佛言也。世人憂墮地獄，而疑往生者，不亦惑哉？

晉慧遠法師與當時高士劉遺民等，結白蓮社於廬山，蓋致精誠於此爾。其後七百年，僧俗修持，獲感應者非一，咸見于淨土傳記，豈誣也哉？

⁴ 永樂北藏本及龍藏本：取；淨土十要（民國版）：受

然贊輔彌陀教觀者，其書山積。唯天台智者大師《淨土十疑論》最為首冠，援引聖言，開決群惑。萬年閻室，日至而頓有餘光；千里水程，舟具而不勞自力。非法藏後身不能至於是也。

傑頃於都下嘗獲斯文，讀示所知，無不生信，自遭酷罰，感寤益深，將廣其傳，因為序引。

熙寧九年仲秋述⁵。

⁵ 永樂北藏本及龍藏本：熙寧九年仲秋述；淨土十要（民國版）：（缺）

淨土十疑論

隋天台智者大師說

第一疑

問曰⁶：諸佛菩薩以大悲為業，若欲救度眾生，祇應願生三界，於五濁三塗中救苦眾生。因何求生淨土自安其身，捨離眾生則是無大慈悲，專為自利，障菩提道。

答曰⁷：菩薩有二種：一者、久修行菩薩道得無生忍者，實當所責；二者、未得已還及初發心凡夫。凡夫菩薩者，要須常不離佛，忍力成就方堪處三界內，於惡世中救苦眾生。故《智度論》云：「具縛凡夫有大悲心願生惡世救苦眾生者，無有是處。」何以故？惡世界煩惱強，自無忍力，心隨境轉，聲色所縛，自墮三塗，焉能救眾生？假令得生人中，聖道難得。或因施、戒、修福得生人中，得作國王、大臣富貴自在，縱遇善知識不肯信用，貪迷放逸，廣造眾罪，乘此惡業，一入三塗，經無量劫，從地獄出，受貧賤身。若不

⁶ 永樂北藏本及龍藏本：問曰；淨土十要（民國版）：問

⁷ 永樂北藏本及龍藏本：答曰；淨土十要（民國版）：答

逢善知識，還墮地獄。如此輪迴，至於今日，人人皆如是，此名難行道也。故《維摩經》云：「自疾不能救，而能救諸疾人？」又《智度論》云：「譬如二人各有親眷為水所溺，一人情急，直入水救，為無方便力故，彼此俱沒；一人有方便，往取船筏，乘之救接，悉皆得脫水溺之難。」新發意菩薩，亦復如是。如是未得忍力，不能救眾生。為此常須近佛，得無生忍已，方能救眾生，如得船者。又論云：「譬如嬰兒不得離母，若也離母，或墮坑井渴乳而死。又如鳥子翅羽未成，祇得依樹傳枝，不能遠去，翅翮成就，方能飛空，自在無礙。」凡夫無力，唯得專念阿彌陀佛，使成三昧，以業成故，臨終斂念得生，決定不疑。見彌陀佛證無生忍已，還來三界，乘無生忍船救苦眾生，廣施佛事，任意自在。故論云：「遊戲地獄行者，生彼國得無生忍已，還入生死國，教化地獄，救⁸苦眾生。」以是因緣，求生淨土，願識其教。故《十住婆沙論》名易行道也。

⁸ 永樂北藏本及龍藏本：救；淨土十要（民國版）：受

第二疑

問：諸法體空，本來無生，平等寂滅。今乃捨此求彼，生西方彌陀淨土，豈不乖理哉？又經云：「若求淨土，先淨其心，心淨故即佛土淨。」此云何通？

答：釋有二義：一者、總答；二者、別答。

總答者，汝若言：「求生西方彌陀淨土，則是捨此求彼，不中理」者，汝執住此，不求西方，則是捨彼著此，此還成病，不中理也。又轉計云：「我亦不求生彼，亦不求生此」者，則斷滅見。故《金剛般若經》云：「須菩提，汝若作是念，發阿耨菩提者說諸法斷滅相。莫作是念！何以故？發菩提心者於法不說斷滅相。」

二、別答者，夫不生不滅者，於生緣中，諸法和合，不守自性，求於生體，亦不可得，此生生時，無所從來，故名不生。不滅者，諸法散時，不守自性，言我散滅，此散滅時，去無所至，故言不滅。非謂因緣生外，別有不生不滅。亦非不求生淨土，喚作無生。為此，《中論》偈云：「因緣所生法，我說即是空，亦名為假名，亦名中道義。」又云：「諸法不自生，亦不從他生，不共

不無因，是故知無生。」又《維摩經》云：「雖知諸佛國，及與眾生空，而常修淨土，教化諸群生。」又云：「譬如有人，造立宮室，若依空地，隨意無礙；若依虛空，終不能成。」諸佛說法，常依二諦，不壞假名而說諸法實相。智者熾然求生淨土，達生體不可得，即是真無生，此謂心淨故，即佛土淨。愚者為生所縛，聞生即作生解，聞無生即作無生解，不知生者即是無生，無生即是生。不達此理，橫相是非，嗔他求生淨土，幾許誤哉！此則是謗法罪人，邪見外道也。

第三疑

問：十方諸佛，一切淨土，法性平等，功德亦等，行者普念一切功德，生一切淨土。今乃偏求一佛淨土，與平等性乖，云何生淨土？

答：一切諸佛土，實皆平等。但眾生根鈍，濁亂者多，若不專繫一心一境，三昧難成。專念阿彌陀佛，即是一相三昧，以心專至，得生彼國。如《隨願往生經》云：「普廣菩薩問佛：『十方悉有淨土，世尊何故偏讚西方彌陀淨土，專遣⁹往生？』佛告普廣：『閻浮提眾生，心多濁亂，為

⁹ 永樂北藏本及龍藏本：遣；淨土十要（民國版）：念

此偏讚西方一佛淨土，使諸眾生專心一境，即易得往生。』若總念一切佛者，念佛境寬，則心散漫，三昧難成，故不得往生。又求一佛功德，與一切佛功德無異，以同一佛法性故。為此念阿彌陀佛，即念一切佛；生一淨土，即生一切淨土。故《華嚴經》云：「一切諸佛身，即是一佛身，一心一智慧，力無畏亦然。」又云：「譬如淨滿月，普應一切水，影像雖無量，本月未曾二。如是無礙智，成就等正覺，應現一切刹，佛身無有二。」智者以譬喻得解。智者若能達一切月影即一月影，一月影即一切月影，月影無二；故一佛即一切佛，一切佛即一佛，法身無二。故熾然念一佛時，即是念一切佛也。

第四疑

問：等是念求生一佛淨土，何不十方佛土中，隨念一佛淨土隨得往生，何須偏念西方¹⁰阿彌陀佛耶？

答：凡夫無智，不敢自專，專用佛語故能偏念阿彌陀佛。云何用佛語？釋迦大師一代說法，處處聖教，唯勸眾生，專心偏念阿彌陀佛，求生

¹⁰ 永樂北藏本及龍藏本：念西方；淨土十要（民國版）：念

西方極樂世界。如《無量壽經》《觀經》《往生論》等，數十餘部經論文等，殷勤指授，勸生西方，故偏念也。又彌陀佛別有大悲四十八願接引眾生。又《觀經》云：「阿彌陀佛有八萬四千相，一一相有八萬四千好，一一好放八萬四千光明，遍照法界念佛眾生，攝取不捨。」若有念者，機、感相應，決定得生。又《阿彌陀經》《大無量壽經》《鼓音王陀羅尼經》等云：「釋迦佛說經時，皆有十方恒沙諸佛舒其舌相，遍覆三千大千世界，證成一切眾生念阿彌陀佛，乘佛大悲本願力故，決定得生極樂世界。」當知阿彌陀佛與此世界偏有因緣。何以得知？《無量壽經》云：「末世法滅之時，特駐此經百年在世。接引眾生，往生彼國。」故知阿彌陀佛與此世界極惡眾生偏有因緣。其餘諸佛、一切淨土，雖一經、兩經略勸往生，不如彌陀佛國，處處經論殷勤叮嚀，勸往生也。

第五疑

問：具縛凡夫惡業厚重，一切煩惱一毫未斷。西方淨土出過三界，具縛凡夫云何得生？

答：有二種緣：一者、自力；二者、他力。自力者，此世界修道，實未得生淨土。是故《瓔

珞經》云：「始從具縛凡夫未識三寶，不知善惡因之與果。初發菩提心，以信為本。住在佛家，以戒為本。受菩薩戒，身身相續，戒行不闕，經一劫、二劫、三劫，始至初發心住。如是修行十信、十波羅蜜等無量行願，相續無間滿一萬劫，方始至第六正心住。若更增進至第七不退住，即種性位。」此約自力，卒未得生淨土。他力者，若信阿彌陀佛大悲願力攝取念佛眾生，即能發菩提心，行念佛三昧，厭離三界身，起行施戒修福，於一一行中，迴願生彼彌陀淨土，乘佛願力，機感相應，即得往生。是故《十住婆沙論》云：「於此世界修道有二種：一者、難行道；二者、易行道。」難行者，在於五濁惡世，於無量佛時，求阿鞞跋致，甚難可得。此難，無數塵沙說不可盡，略述三¹¹五：一者、外道相善，亂菩薩法；二者、無賴惡人，破他勝德；三者、顛倒善果，能壞梵行；四者、聲聞自利，障於大慈；五者、唯有自力，無他力持。譬如跛人步行，一日不過數里，極大辛苦，謂自力也。易行道者，謂信佛語，教念佛三昧，願生淨土。乘彌陀佛願力攝持，決定往生，不疑也。如人水路行，藉船力故，須臾即

¹¹ 永樂北藏本及龍藏本：述三；淨土十要（民國版）：陳有

至千里，謂他力也。譬如劣夫從轉輪王，一日一夜周行四天下，非是自力，轉輪王力也。若言有漏凡夫不得生淨土者，亦可有漏凡夫應不得見佛身。然念佛三昧，並無漏善根所起。有漏凡夫隨分得見佛身麤相也。菩薩見微細相。淨土亦爾。雖是無漏善根所起，有漏凡夫發無上菩提心，求生淨土¹²，常念佛故，伏滅煩惱，得生淨土，隨分得見麤相，菩薩見微妙相。此何所疑？故《華嚴經》說：「一切諸佛刹，平等普嚴淨，眾生業行異，所見各不同。」即其義也。

第六疑

問：設令具縛凡夫得生彼國，邪見、三毒等常起，云何得生彼國即得不退，超過三界？

釋曰¹³：得生彼國，有五因緣不退。云何為五？一者、阿彌陀佛大悲願力攝持，故得不退；二者、佛光常照故，菩提心常增進不退；三者、水鳥、樹林、風聲、樂響皆說苦、空，聞者常起念佛、念法、念僧之心，故不退；四者、彼國純諸菩薩以為良友，無惡緣境，外無神鬼、魔邪，

¹² 永樂北藏本及龍藏本：淨土；淨土十要（民國版）：土淨

¹³ 永樂北藏本及龍藏本：釋曰；淨土十要（民國版）：答

內無三毒等，煩惱畢竟不起，故不退；五者、生彼國即壽命永劫，共菩薩、佛齊等，故不退也。在此惡世，日月短促。經阿僧祇劫，復不起煩惱，長時修道，云何不得無生忍也？此理顯然，不須疑也。

第七疑

問：彌勒菩薩，一生補處，即得成佛。上品十善，得生彼處，見彌勒菩薩，隨從下生三會之中，自然而得聖果。何須求生西方淨土耶？

答：求生兜率，一日¹⁴聞道見佛，勢欲相似，若細比較，大有優劣。且論二種：一者、縱持十善，恐不得生。何以得知？《彌勒上生經》云：「行眾三昧，深入正定，方始得生。」更無方便接引之義。不如阿彌陀佛本願力、光明力，但有念佛眾生，攝取不捨。又釋迦佛說九品教門，方便接引，殷勤發遣，生彼淨土。但眾生能念彌陀佛者，機感相應，必得生也。如世間慕人，能受慕者，機會相投，必成其事。二者、兜率天宮是欲界，退位者多。無有水鳥、樹林、風聲、樂響，眾生聞者，悉念佛，發菩提心，伏滅煩惱；又有

¹⁴ 永樂北藏本及龍藏本：一日；淨土十要（民國版）：亦曰

女人，皆長諸天愛著五欲之心。又天女微妙，諸天耽玩，不能自勉。不如彌陀淨土，水鳥、樹林，風聲、樂響，眾生聞者，皆生念佛，發菩提心，伏滅煩惱。又無女人、二乘之心，純一大乘，清淨良伴。為此，煩惱惡業畢竟不起，遂至無生之位。如此比較¹⁵，優劣顯然，何須致疑也？如釋迦佛在世之時，大有眾生見佛不得聖果者如恆沙。彌勒出世亦爾，大有不得聖果者。未如彌陀淨土，但生彼國已，悉得無生法忍，未有一人退落三界，為生死業縛也。

又聞西國傳云：「有三菩薩：一名無著、二名世親、三名師子覺。此三人契志同生兜率，願見彌勒。若先亡者，得見彌勒，誓來相報。師子覺前亡，一去數年不來。後世親無常，臨終之時，無著語云：『汝見彌勒，即來相報！』世親去已，三年始來。無著問曰：『何意如許多時始來？』世親報云：『至彼天中，聽彌勒菩薩一坐說法，旋繞即來相報。為彼天日長故，此處已經三年。』又問：『師子覺今在何處？』世親報云：『師子覺為受天樂，五欲自娛，在外眷屬。從去已來，總不見彌勒。』」諸小菩薩生彼，尚著五欲，何況

¹⁵ 永樂北藏本及龍藏本：校；淨土十要（民國版）：較

凡夫？為此，願生西方定得不退，不求生兜率也。

第八疑

問：眾生無始已來，造無量業，今生一形，不逢善知識，又復作一切罪業，無惡不造。云何臨終，十念成就，即得往生？出過三界結業之事，云何可通？

釋曰¹⁶：眾生無始已來，善惡業種多少強弱並不得知。但能臨終遇善知識十念成就者，皆是宿善業強，始得遇善知識，十念成就。若惡業多者，善知識尚不可逢，何可論十念成就？又汝以無始已來惡業為重，臨終十念為輕者，今以道理三種校¹⁷量，輕重不定，不在時節久近多少。云何為三？一者、在心；二者、在緣；三者、在決定。在心者，造罪之時，從自虛妄顛倒生；念佛者，從善知識聞說阿彌陀佛真實功德名號生。一虛一實豈得相比？譬如萬年闇室，日光暫至而闇頓滅，豈以久來之闇不肯滅耶？在緣者，造罪之時，從虛妄癡闇心，緣虛妄境界顛倒生；念佛之

¹⁶ 永樂北藏本及龍藏本：釋曰；淨土十要（民國版）：答

¹⁷ 永樂北藏本及龍藏本：校；淨土十要（民國版）：較

心，從聞佛清淨真實功德名號，緣無上菩提心生。一真一偽豈得相比？譬如有人被毒箭中，箭深毒¹⁸傷肌破骨，一聞滅除藥鼓，即箭出毒除。豈以箭深毒¹⁹，而不肯出也？在決定者，造罪之時以有間心、有後心也；念佛之時，以無間心、無後心，遂即捨命，善心猛利，是以即生。譬如十圍之索，千夫不制；童子揮劍，須臾兩分。又如千年積柴，以一豆火焚，少時即盡。又如有人，一生已來，修十善業，應得生天；臨終之時，起一念決定邪見，即墮阿鼻地獄。惡業虛妄，以猛利故，尚能排一生之善業，令墮惡道。豈況臨終猛心念佛，真實無間善業，不能排無始惡業得生淨土？無有是處。又云：「一念念佛，滅八十億劫生死之罪。」為念佛時，心猛利故，伏滅惡業，決定得生，不須疑也。上古相傳，判十念成就作別時意者，此定不可。何以得知？《攝論》云：「由唯發願故。」全無有行。《雜集論》云：「若願生安樂國土即得往生，聞無垢佛名即得阿耨菩提者，並是別時之因。」全無有行。若將臨終無間十念猛利善行是別時意者，幾許誤哉！願諸行

¹⁸ 永樂北藏本及龍藏本：慘；淨土十要（民國版）：慘

¹⁹ 永樂北藏本及龍藏本：慘；淨土十要（民國版）：慘

者，深思此理，自牢其心，莫信異見，自墜陷也。

第九疑

問：西方去此十萬億佛刹，凡夫劣弱，云何可到？又《往生論》云：「女人及根缺，二乘種不生。」既有此教，當知女人及以根缺者，**定必**²⁰不得往生？

答：為對凡夫肉眼、生死心量說耳，西方去此十萬億佛刹。但使眾生淨土業成者，臨終在定之心即是淨土受生之心，動念即是生淨土時。為此，《觀經》云：「彌陀佛國去此不遠。」又業力不可思議，一念即得生彼，不須愁遠。又如人夢，身雖在床，而心意識遍至他方一切世界，如平生不異也。生淨土亦爾，動念即至，不須疑也。「女人及根缺，二乘種不生」者，但論生彼國，無女人及無盲、聾、瘖、瘡人，不道此間女人、根缺人不得生彼。若如此說者，愚癡全不識經意。即如韋提夫人，是請生淨土主，及五百侍女，佛授記悉得往生彼國。但此處女人及盲、聾、瘖、瘡人，心念彌陀佛，悉生彼國已，更不受女身，亦不受根缺身。二乘人但迴心願生淨土，至彼更無

²⁰ 永樂北藏本及龍藏本：定必；淨土十要（民國版）：必定

二乘執心。為此，故云「女人及根缺，二乘種不生」，非謂此處女人及根缺人不得生也。故《無量壽經》四十八願云：「設我得佛，十方世界一切女人，稱我名號，厭惡女身，捨命之後，更受女身者，不取正覺。」況生彼國，更受女身？根缺者亦爾。

第十疑

問：今欲決定求生西方，未知作何行業、以何為種子得生彼國？又凡夫俗人，皆有妻子，未知不斷婬欲得生彼否？

答：欲決定生西方者，具有二種行，定得生彼：一者、厭離行；二者、欣願行。言厭離行者，凡夫無始已來，為五欲纏縛，輪迴五道，備受眾苦，不起心厭離五欲，未有出期。為此，常觀此身膿、血，屎、尿，一切惡露不淨臭穢。故《涅槃經》云：「如是身城，愚癡羅刹止住其中。誰有智者，當樂此身？」又經云：「此身眾苦所集，一切皆不淨。扼縛癰瘡等，根本無義利。上至諸天身，皆亦如是。」行者若行、若坐、若睡、若覺，常觀此身唯苦無樂，深生厭離。縱使妻房不能頓斷，漸漸生厭，作七種不淨觀：一者、觀此

媿欲身，從貪愛煩惱生，即是種子不淨；二者、父母交會之時，赤白和合，即是受生不淨；三者、母胎中在生藏²¹下居熟藏²²上，即是住處不淨；四者、在母胎時，唯食母血，即是食噉不淨；五者、日月滿足，頭向產門，膿血俱出，臭穢狼藉，即是初生不淨；六者、薄皮覆上，其內膿血遍一切處，即是舉體不淨；七者、乃至死後脬脹爛壞，骨肉縱橫，狐狼食噉，即是究竟不淨。自身既爾，他身亦然。所愛境界，男女身等，深生厭離，常觀不淨。若能如此觀身不淨之者，媿欲煩惱漸漸減少。又作十想等觀，廣如經說。又發願：「願我永離三界雜食、臭穢、膿血不淨、耽荒五欲男女等身，願得淨土法性生身。」此謂厭離行。

二、明欣願行者，復有二種：一者、先明求往生之意；二者、觀彼淨土莊嚴等事，欣心願求。明往生意者，所以求生淨土，為欲救拔一切眾生苦故。即自思忖：「我今無力，若在惡世，煩惱境強，自為業縛，淪溺三塗，動經劫數，如此輪轉，無始已來未曾休息，何時能得救苦眾生？為此求生淨土，親近諸佛，若證無生忍，方能於惡

²¹ 永樂北藏本及龍藏本：藏；淨土十要（民國版）：臍

²² 永樂北藏本及龍藏本：藏；淨土十要（民國版）：臍

世中救苦眾生。」故《往生論》云：「言發菩提心者，正是願作佛心；願作佛心者，則是度眾生心；度眾生心者，則是攝眾生佛國心。」

又願生淨土須具二行：一者、必須遠離三種障菩提門法；二者、須得三種順菩提門法。何者為三種障菩提法？一者、依智慧門，不求自樂，遠離我心貪著自身故。二者、依慈悲門，拔一切眾生苦，遠離無安眾生心故。三者、依方便門，當憐愍一切眾生，欲與其樂，遠離恭敬供養自身心故。若能遠三種菩提障，則得三種順菩提法：一者、無染清淨心，不為自身求諸樂故。菩提是無染清淨處，若為自身求樂，即染身心障菩提門。是故，無染清淨心是順菩提門。二者、安清淨心，為拔眾生苦故。菩提心是安隱一切眾生清淨處，若不作心拔一切眾生令離生死苦，即違菩提門。是故，安清淨心是順菩提門。三者樂清淨心，欲令一切眾生得大菩提、涅槃故。菩提、涅槃是畢竟常樂處，若不作心令一切眾生得畢竟常樂，即遮菩提門。此菩提因何而得？要因生淨土，常不離佛。得無生忍已，於生死國中救苦眾生，悲智內融，定而常用，自在無礙，即菩提心。此是願生之意。

二、明欣心願求者。希心起想，緣彌陀佛。若法身、若報身等，金色光明，八萬四千相，一一相中八萬四千好，一一好放八萬四千光明，常照法界，攝取念佛眾生。又觀彼淨土七寶莊嚴妙樂等，備如無量壽經觀經十六觀等，常行念佛三昧及施、戒、修等，一切善行悉已迴施一切眾生同生彼國，決定得生。此謂欣願門也。

淨土十疑論(終)

淨土十疑論後序

宋左宣義郎陳瓘述²³

人心無常，法亦無定。心法萬差，其本在此。信此則遍信，《華嚴》所以說十信；疑此則遍疑，智者所以說十疑。出疑入信，一入永入。不離於此，得究竟處。淨土者，究竟處也。此處有說法之主，名無量壽。此佛說法，未嘗間斷。疑障其耳，則聾而不聞；疑障其心，則昧而不覺。不聞不覺，安住惡習。讚歎不念，隨喜麤心，妄指蓮胞以為虛誕。終不自念此分段身，從何而得？自何而來？胎獄穢濁，真實安在？信憑業識，自隔真際。於一幻境，非彼執此。生生不靈，永絕聖路。

以如是故，釋迦如來起大慈愍，於穢濁中發大音聲，讚彼淨土上妙之樂。於生死中為大船師，載以法船令趨彼岸。晝夜度生，無有休息。然而彌陀之岸，本無彼此；釋迦之船，實非往來。譬如一燈分照八鏡，鏡有東西，光影無二。彌陀說法遍光影中，而釋迦方便獨指西鏡。故已到彼岸

²³ 出淨土十要（民國版）；永樂北藏本及龍藏本缺

者，乃可以忘彼此；未入法界者，何自而混東西？於此法中，若未究竟，勿滯方隅，勿分彼此，但當正念，諦信而已。此二聖之意，而智者之所以信也。

信者，萬善之母；疑者，眾惡之根。能順其母，能耨²⁴其根，則向之所謂障緣眾生，聾可復聞，昧可復覺，未出生死得出生死，未生淨土得生淨土。順釋迦之誨往面彌陀，隨彌陀之願來助釋迦。在此而遍歷十方，即西而普入諸鏡。自二聖建立以來，如是之人，如河沙數，云何不信？云何而疑？能自信已，又作方便令諸未信無不信者，此則智者之所以為悲也。

明智大師中立，學智者之道，不順其文，而順其悲，所以又印此論，冠以次公之序，予乃申廣其說，以助其傳。

元祐八年七月十一日，左宣義郎前簽書鎮東軍節度判官廳公事陳瓘序²⁵。

²⁴ 永樂北藏本及龍藏本：耨；淨土十要（民國版）：鋤

²⁵ 出永樂北藏本及龍藏本，淨土十要（民國版）缺

南无护法韦驮尊天菩萨



此咒置經書中可滅誤跨之罪